

Na Aruba tin hopi obheto cu ainda por yega den poder di e Museonan

Directora Desiree Croes ta pidi tur atencion pa e asunto aki

STA. CRUZ -- Na Aruba mes tin hopi hende cu tin obhetonan den nan poder cu por wordo warda y conserva den un museo. Nos di Fundacion JMO ta referi den nos caso riba placa (moneda y biyete) como tambe tur tipo di cos bieu (antique) di Aruba. Desiree Croes kier a corda tur persona cu tin den nan poder artefactonan cu a ser usa na Aruba pa por favor no tira esakinan afor pero entrega nan na museonan di Juan Mario Odor pa asina nos por wardanan y tambe exhibinan como obhetonan di tempo pasa. No mester lubida cu na final di siglo 19 nos islanan a usa moneda di diferente pais y tur tabata circula aki mes, manera e fuerte di Venezuela, Morgan dollar Mericano y mucho mas. Tambe tin hopi persona cu ta bin di pais leu, nan yiunan y demas generacion ta Arubiano y nan tambe por tin moneda di nan antepasado den nan poder y no tin uso pa nan. Probablemente nan

ta precioso recuerdo pero den un museo nan lo tin mas poder pa yega na otro hende tambe por aprecia obheto of moneda di antes. E museonan ta archiva tambe e historia di cada obheto. Riba e foto por mira sr. Merryweather entregando Museo Numismatico Aruba dos moneda cu el'a hereda di su tata y abuelo cu ta procedente di Gran Bretania. Ta trata di dos 'one penning' di año 1864 y 1901. Di parti di Fundacion JMO nos kier un biaha mas motiva tur hende pa haci entrega di nan obheto, como donacion si ta posibel y asina haci nos museonan bira mas grandi y mas importante, tur esaki na bienestar general di Aruba. Fundacion Juan Mario Odor ta sostene y cuida Museo Numismatico Aruba como tambe Museo Antigüedad & Herencia Cultural di Aruba. Pa entrega obheto por yama libremente na telefoon 5828831 of 9656969.

